

**TEZAUUR LITURGIC**  
**12 OCTOMBRIE**

**SLUJBA**  
**SF. IERARH-**  
**MĂRTURISITOR**  
**NICOLAE**  
**MOGHILEVSKI,**  
**MITROPOLITUL**  
**ALMA ATEI**  
**ȘI KAZAHSTANULUI**



**MOSCOVA, 2000**



## Служба

# иже во святых отцу нашему Николаю, митрополиту Алма- Атинскому и Казахстанскому, исповеднику На малой вечерни

На Господи, воззвах: стихиры поем на 4, глас 8-й

Прежде век Сый, Боже, / времена и веки  
сотворивый / и вся в мудрости Твоей  
устроивый, / Церковь на земли противу зла  
воинствующую / многоразличною благодатию  
Твоею облагодетельствовал еси, / даровав в  
последния сия времена Казахстанской  
митрополии, / дивнаго иерарха и исповедника, /  
Николая, новаго чудотворца, / его же память  
днесь благочестно совершающе, / всесвятое Имя  
Твое поем и славим.

От века и до века Ты еси, Царю и Господи, /  
Пресущественное Естество, в Троице певаемое  
Ипостасей, / преестественно Себе даровавший  
присно тя вожделевшему, / исповеднику Твоему  
Николаю, / Казахстанския митрополии  
священноначальнику, / их же и паству свою Тя,

Присносущнаго, знати научи,/ его же  
молитвами,/ неизреченнаго зрениа Твоего  
сподоби ны, Человеколюбче.

Триипостастный, Владыко,/ Отче, Сыне, и Душе  
Святыи,/ Единое Божество и Царство,/ от  
небесных чинов ангельских воспеваемый,/  
приими и наше из глубины сердца приносимое  
Тебе благохваление/ и мольбами святителя и  
исповедника Твоего Николая,/ подаждь и нам в  
сонме ликующих угодников и ангелов Твоих/  
воспевати Тя во веки.

### Слава, глас 2-й

Возсия днесь память,/ Казахстанскаго  
чудотворца/ святителя Николая,/ просвещающа  
и вразумляюща благочестивых собрание,/ иже  
во всем житии бысть непоколебимый столп  
благочестия,/ нищих защититель и болящих  
немздоприемный врач,/ к свету богопознания  
всех приводяй,/ да из глубины души в радости  
вопийют:/ Боже наш Триипостастный,/ спаси  
души наша благоволением Твоим,/ да величаем  
Тя во веки.

И ныне. Богородичен глас тойже.

### На стиховне стихиры, глас 5-й

Приидите, христоименитии людие,/ восхвалим  
хриstopодражательнаго отца и пастыря

нашего,/ небесное добродетелей богатство на  
земли стяжавша/ и горняго Отечества о Христе  
Духом Святым достигша,/ иже молит Всесвятую  
Божественную Троицу,/ спастися душам  
нашим.

**Стих:** Священницы Твои оденутся в правду,/ и  
преподобнии Твои возрадуются.

Святаго Православия проповедниче,/ Христа  
Бога, во плоти пришедша грешныя спасти,/ во  
вся концы Казахстанския митрополии вествовал  
еси/ и в скорбех и печалех чад церковных  
пребывающих,/ благодатию Божиею, в тебе  
сущею, исцелял еси./ Тем же молим Тя,  
святителю Николае, исповедниче Христов,/  
молися Господеви,/ паству твою неодоленну в  
заключениях сотворити/ и небеснаго  
блаженства сподобити.

**Стих:** Блажен муж, бояйся Господа,/ в заповедех  
Его восхощет зело.

Любви Божественней всем сердцем и душою  
соединился еси,/ временная и тленная вся  
презрел еси./ Безбожие и обновленческое  
злочестие искореняя,/ утверждал еси народы во  
истиннем благочестии пребывати,/ да в  
скоротечнем земнем житии евангельскою  
правдою поживше,/ Отечества Горняго  
унаследят./ Тем же непрестай о нас Небеснаго

Домовладыку молити,/ да предстательством  
Пречистыя Матери Своея,/ подаст нам в  
скорбех утешение и исправление жития,/ и  
всерадостнаго века наследие.

Слава и ныне, Богородичен глас тойже

Тропарь, глас 7-й

Яко светозарное светило,/ лучами  
Божественных дарований сияющее,/ яви ты  
Солнце Правды Христос Бог наш,/ тьму  
безбожия и злонравия далече отгоняюща,/ и  
зарями богопознания осияюща вопиющих  
верно:/ Радуйся, святе Николае,/ Христов  
исповедниче и Казахстанский чудотворче.

Слава и ныне, Богородичен: глас тойже:

### **На Велицей вечерни**

Блажен муж: 1-й антифон.

На Господи, воззвах: стихиры на 8, Глас 4-й

Семя благодати Божия,/ благонравием  
родительским всеянное в сердце твоём,/ соблюл  
еси боголюбиве/ и от юности всею душою и  
крепостию твоею Христу прилепился еси,/  
злостраданием и темничным  
томлением,/ терпением и кротостию,/ и  
молитвами непрестанными Тому угодил еси,/ и

ныне усердно Господу помолися, / спастися душам нашим.

Отрясл еси, яко ленностный сон, мирская треволнения / и Божию указанию последуя, / иноческих ради доблестей / в преславную Нилову пустынь пришел еси. / В ней же, иго Христово на рамо восприим, / желательно Тому сораспялся еси, / Помошницу имея Того Рождшую Приснодеву Всемирную Заступницу, / Николая чудотворца имя, яко миро, свыше излиянное, прияв, / в житии твоём сему уподобился еси / и ныне с ним молися о нас Господеви, / спастися душам нашим.

Во благочестии угодникам Божиим ревностно подражая, / в мале был еси верен / и великия чести архиерейския благодати удостои тя Господь, / о спасении душ людских вручая тебе попечение, / еже благоплодно в самоотверженном житии совершив, вшел еси в радость Господа Своего, / идеже предстоя Ему с соборы святых / моли, спастися душам нашим.

На тебе, святе, утвердися истина Господня, / усты пророка предреченная: / праведник, яко финикс процветет / и яко кедр, иже в Ливане, умножится. / Тем же, яко древо благосеннолиственное и многоплодное / в Церкви явился еси, / источая притекающим к

тебе благодати Божия струю животочную/ и  
моляся о спасении душ наших.

Божественною благодатию Святаго Духа  
просветився,/ святителю Николае преславне,/ в  
гонениях от безбожных венец чистаго  
исповедничества за Христа доблественне  
стяжав,/ сликвен новомученником Российским  
явился еси,/ с ними же, по отшествии престолу  
Владычню предстоя,/ несозданным Светом  
Трисолнечным озаряем,/ молися Господеви  
спастися душам нашим.

От земных на небесная,/ яко небопарный орел,  
пречудне, востекл еси,/ но и паству твою  
благодатными дарами не оставил еси,/ в  
Царстве неизреченныя славы Божия/ со  
дерзновением сию воспоминаеши/ и молишися  
спастися душам нашим.

Просветися житие твое/  
хриstopодражательными светлостьми,/  
лжеименнаго разума тьму отгоняя./ Тем же, яко  
светозарное светило Казахстанския митрополии  
явился еси,/ святителю и исповедниче Христов  
Николае,/ верныя ко обретению Царства Божия  
право путеводя,/ вселился еси, идеже сияет  
Свет Единосущныя Троицы./ Темже  
светозарную твою память совершающе,

приснопамятне,/ ходатая и заступника тя  
почитаем.

По достоянию о тебе радуется/ мучеников и  
исповедников светоявленное собрание,/  
небесных чинов лики,/ апостолов и святителей  
огнезрачное сословие,/ преподобных богоносцев  
полче/ и священныя митрополии твоя паства/  
восхваляюще Триединого Бога, дивнаго во  
святых Своих/ и вопиюще тебе таковая:/  
Радуйся, святе Николае,/ Христов исповедниче  
и Казахстанский чудотворче.

**Слава, глас 8-й:**

Весь исполнен быв любви Божественныя,/  
явился еси Святаго Духа нерукотворенный  
храм,/ дарами благодати преукрашенный:/  
душу бо твою за врученное ти стадо, полагая/ и  
всем духовне во всем угождая,/ не своея, но  
ближняго пользы искал еси,/ да всяко некия  
спасеши./ Не забуди ныне и нас, в добродетели  
убогих/ и твоего наставления ищущих, да зовем  
ти:/ Радуйся, святе Николае, Христов  
исповедниче/ и Казахстанский чудотворче

**И ныне, Богородичен, глас тойже:**

Царь Небесный за человеколюбие на земли  
явился/ и с человеки поживе,/ от Девы бо  
Чистыя плоть приемый/ и из Нея прошедый с  
восприятием,/ Един есть Сын, сугуб естеством,/

но не Ипостасию./ Темже, совершенна Того Бога/ и совершенна Человека воистинну проповедающе,/ исповедуем Христа Бога нашего:/ Егоже моли, Мати Безневестная,/ помиловаться душам нашим.

**Вход. Прокимен дне. И чтения.**

**Притчей чтение (главы 10, 3 и 8):**

Память праведнаго с похвалами,/ и благословение Господне на главе его. / Блажен человек, иже обрете премудрость, / и смертен, иже уведет разум. / Лучше бо сию куповати,/ нежели злата и сребра сокровища. / Честнейшая же есть камней многоценных,/ все же честное недостойно ея есть./ Долгота бо дней и лета живота в деснице ея,/ в шуйце же ея богатство и слава. / От уст ея исходит/ правда,/ закон же и милость на языке носит./ Послушайте убо мене, о чада, / честная бо реку, / и блажен человек, иже пути моя сохранит: / исходи бо Мои — исходи живота,/ и уготовляется хотение от Господа. / Сего ради молю вас / и предлагаю мой глас сыновом человеческим, / яко аз, премудрость, устрои совет / и разум, и смысл аз призвах. / Мой совет и утверждение,/ мой разум, моя же крепость. / Аз мене любящая люблю, / ищущии же мене обрящут благодать./ Разумейте убо, незлобивии, коварство,/

ненаказанныи же, прилагайте сердца./  
Послушайте мене и паки, честная бо реку,/ и  
отверзу от устен правая,/ яко истине поучится  
гортань мой,/ мерзки же предо мною устны  
лживыя. / С правдою вси глаголы уст моих:  
/ничтоже в них стропотно, ниже развращенно.  
/ Вся права суть разумевающим / и проста  
обретающим разум./ Научаю бо вас истине,/ да  
будет о Господе надежда ваша, /и исполнитесь  
Духа.

### Премудрости Соломоновы чтение (глава 10):

Уста праведнаго каплют премудрость, / устне  
же мужей мудрых ведут благодать./ Уста  
мудрых поучатся премудрости,/ правда же  
избавляет от смерти. / Скончавшуся мужу  
праведну не погибнет надежда, / сын бо  
праведен рождается в живот / и во благих своих  
плод правды обымет./ Свет праведным всегда/  
и от Господа обрящут благодать и славу./ Язык  
мудрых добрая свесть,/ и в сердце их почиет  
мудрость./ Любит Господь преподобная сердца,/  
приятни же ему вси непорочнии в пути./  
Мудрость Господня просвещает лице  
разумнаго./ Постигает бо желающия ю,/ прежде  
даже, разумети ю, / и удобь узрится от любящих  
ю./ Утреневавый к ней не утрудится,/ и бдяй ея  
ради вскоре без печали будет./ Яко достойных  
ея сама обходит ищущи, / и во стезях ея

является им благоприемне. / Мудрости  
никогдаже одолеет злоба. / Сих ради и рачитель  
бых доброты ея/ и возлюбих ю, и поисках от  
юности мояя./ И взысках невесту привести себе,  
/ яко всех Владыка возлюби ю./ Таинница бо  
есть Божия хитрости / и обретательница дел его.  
/ Труды ея суть добродетели,/ целомудрию же и  
разуму та учит, правде и мужеству, / ихже  
потребнее ничтоже есть в житии человеком./  
Аще же и многоаго искусства желает кто, / весть  
древняя и быти хотящая разсмотрит. / Свесть  
извития словес и разрешения гаданий,/  
знамения и чудеса проразумеет и сбытия времен  
и лет,/ и всем советник есть благ,/ яко  
безсмертие есть в ней и благославие во общении  
словес ея./ Сего ради беседовах ко Господу и  
помолихся Ему, / и рех от всего сердца моего: /  
Боже отцев и Господи милости, / сотворивый  
вся словом Твоим / и мудростию Твоею  
устроиый человека,/ да владеет бывшими от  
Тебе тварми,/ и да управит мир в преподобии и  
правде. / Дажь ми Твоему престолу  
присядающую премудрость/ и не отлучи мене от  
отрок Твоих,/ яко аз раб Твой и сын Рабыни  
Твоея./ Посли ю с Небес от святаго жилища  
Твоего/ и от Престола славы Твоея,/ да суци со  
мною научит мя,/ что благоугодно есть пред  
Тобою./ И наставит мя в разум и сохранит мя в

славе своей./ Помышления бо смертных вся боязлива/ и погрешительна умышления их.

### Премудрости Соломоновы чтение (глава 4):

Похваляему праведнику возвеселятся людие,/ безсмертие бо есть память его,/ яко от Господа познавается и от человек,/ и угодна Господеви душа его./ Возлюбите убо, о, мужие, мудрость и поживете,/ восхощите ея и наказами будете,/ начало бо ея любви и соблюдение закона. / Почтите премудрость, да во веки царствуете. / Возвещу вам и не скрюю от вас тайн Божиих: / яко Той мудрости Наставник есть и мудрых Исправитель, / и всякому смыслу и делу Хитрец./ И всем смыслом научит мудрость,/ есть бо в ней дух разумен и свят и сияние света присносущнаго / и образ благости Божия./ Та други Божия и пророки устрояет,/ благолѣпнейши же есть солнца и паче всякаго сотворения звезд,/ свету сосуждаема, обретается первейши. / Та угождающих ей от болезней избави и настави на стези правыя,/ даде им разум имети свят и сохрани я от ловящих и подвиг крепок подаде им. / Да разумеют вси, яко сильнейши всего есть благочестие/ и никогдаже преможет злоба мудрости,/ ниже преидет злыя обличающи суд./ Рекоша же в себе, помысливше неправедно:/ насильствуем праведному и не пощадим

преподобства его, / ни усрадимся седин  
старости многолетны./ Будет бо нам крепость  
закон и уловим праведнаго, / яко неугоден нам  
есть и противится делом нашим / и поносит нам  
отпадение закона / и обличает нам согрешения  
наказания нашего./ Возвещает нам разум имети  
Божий/ и отрока Господня себе именует. /  
Бысть нам на обличение помышлением нашим,  
/ и тяжек нам есть и видим, / яко неподобно  
иным житие его и изменены стези его, / в  
поругание вменихомся ему / и удаляется от  
путей наших, яко от нечистот, / и блажит  
последняя праведных./ Увидим убо, аще словеса  
его истинна суть,/ искусим яже сбываются  
ему./ Руганием и мукою истяжем его,/ да  
разумеем кротость его / и искусим беззлобство  
его, / смертью безобразною осудим его,/ будет  
бо посещение от словес его./ Сия помыслиша и  
прельстишася, / ослепи бо я злоба их / и не  
разумеша таин Божиих, / и не разсудиша, яко  
Ты еси Бог Един,/ живота имеяй и смерти  
власть, / и спасаяй во время скорби, и  
избавляяй от всякаго зла. / Щедр и Милостив и  
дая подобным Своим благодать,/ и Своею  
мышцею гордым противляся.

**На литии стихирь, глас 1-й:**

Радостно днесь ликовствует богоспасаемый град  
Алма-Ата/ и с ним вси концы священныя

Казахстанския митрополии соторжествуют, /  
память совершающе Боголюбезнаго святителя и  
исповедника Николая, / узы и темницы за  
Христа мужественне претерпевшаго, / и  
сборища нечестивых себе отлучившаго, / на  
небеси днесь со Христом, Царем вечным,  
царствующа, / и на земли благодатию  
Христовою чудодействующа. / Темже, к честней  
раце его верно притекающе, / исцеление душам  
и телесам нашим уллучаем / и, светом  
богопознания просвещаем, глаголем: / сподоби  
нас даров небесных, святе, / и христоименитое  
православных стадо твое сохрани, / спасение  
подавая душам нашим.

Приидите восхвалим всечестнаго архипастыря /  
и богоноснаго отца нашего, / венцем чистаго  
исповедничества преукрашеннаго / и Христу  
Подвигоположнику нашему во славе  
незаходимей предстояща, / в сонме светозарных  
избранников присно радующася. / Тем же, на  
земли память его восхваляюще, во умилении  
воспоим: / Радуйся, служителю Божий, гонения  
правды ради смиренно претерпевый; / Радуйся,  
розго винограда Христова, мног плод в пособие  
православным творящая; / Радуйся, града  
Алматы славо и ограждение; / Радуйся, всех  
градов и весей Казахстанский неусыпный  
страже и теплый хранителю; / Радуйся, святе

Николае,/ Христов исповедниче и  
Казахстанский чудотворче.

Днесь вернии, всепразднственнo ликовствуем,/ во псалмех и песнех Господеви поюще/ и чтуще Того служителя благоприятна,/ добродетельми сияюща и сердца наша небесными зарями просвещающа,/ и единомудренно воспевающе того, песнь тако рцем:/ Радуйся, архипастырю благосердый,/ любовью и кротостию вся покрываяй;/ Радуйся, Владыко прелюбимый, бедствующия защищай;/ Радуйся, милостивый скорбящим помощниче./ Радуйся, ищущим спасения готовый споспешниче;/ Радуйся, святе Николае, Христов исповедниче и Казахстанский чудотворче.

**Слава, глас 6-й:**

Имуще сердце твое, яко добрую почву,/ к восприятию семене Слова Божия всегда отверстым,/ неуклонно шел еси по стопам Христа, зовуща:/ аще, кто хочет в след Мене идти,/ да отвержется себе и возмет крест свой,/ и в след Мене да идет./ И венцем добропобедным чистаго исповедничества от Него украшенный,/ Того, яко Подвигоположника и Судию,/ яко Мздовоздаятеля и яко Милостива,/ моли спастися душам нашим.

И ныне, Богородичен или Крестобогородичен,  
глас той же:

Что зримое видение,/ еже Моима очима  
видится, о, Владыко?/ Содержай всю тварь, на  
древо воздвижен быв,/ и умираеши, всем  
подавая жизнь,/ Богородица, плачущися,  
глаголаше,/ егда узре на Кресте возносима/ из  
Нея неизреченно возсиявшаго/ Бога и Человека.

На стиховне стихиры, глас 2-й.

Яко, Богом данный,/ от родителей Феодосием  
нареченный,/ тезоименитому мученику в истом  
исповедании Христа Бога подражал еси,/ и  
премного дарования Божественная стяжав,/ у  
престола огнезрачнаго Святыя Троицы  
предстоиши,/ моляся о спасении нашем.

**Стих:** Праведник, яко финикс процветет, яко  
кедр иже в Ливане умножится.

Яко миро, свыше излиянное,/ имя новое во  
иночестве восприял еси,/ пророчески на  
служение твое указующее, святе Николае  
исповедниче Христов,/ и народа множества/  
хриstopодражательною кротостию и любовью в  
послушание Богу преобрел еси,/ со апостолы и  
Николаем Угодником/ в невечернем дни  
Царствия Божия, радуяся, водворяешися,/  
моляся о спасении нашем.

**Стих:** Насаждени в дому Господни/ во дворех  
Бога нашего процветут.

Видяще, в немногих храмах,/ подобно оазисам в  
бескрайней безбожия пустыне стоящих,/ паству  
твою у источников истиннаго богопочитания  
пиющую воду живу,/ усердно сию посещал еси,/  
апостолом Христовым соревнуя,/ назидая в  
вере, укрепляя в надежде и утверждая в  
любви./ И по отшествии твоём в небесном  
всевеселом воздаянии пребывая,/ наследие твое  
не оставил еси,/ моляся о спасении душ наших.

**Слава, глас 3-й:**

Церкви Христовы столпе непоколебимый,/  
отеческих преданий истинный хранителю,/  
веры православныя исповедниче  
благочестивый,/ Казахстанския митрополии  
похвало и утверждение, святе Николае,/ всех  
нас, память твою светоявленную  
совершающих,/ поминай богоприятными  
твоими молитвами,/ да прославим Спаса, тя  
прославившаго,/ дивнаго во святых Своих, Бога  
нашего.

**И ныне, глас той же, Богородичен:**

Призри на мольбы Твоих раб, Всенепорочная,/  
утоляющи люта на ны возстанья, всякия  
скорби нас изменяющи: / Тя бо Едино твердое и  
известное утверждение имамы/ и Твое

предстательство стяжахом, / да не постыдимся,  
Владычице, ты призывающих, / потщися на  
умоление Тебе верно вопиющих: / Радуйся,  
Владычице, всех Помоще, Радосте и Покрове / и  
Спасение душ наших.

**Или Крестобогородичен, глас той же:**

Видящи Тя распинаема Христе, / Тебе рождшая,  
вопяше: / что странное еже вижу таинство,  
Сыне Мой? / Како на древе умираеши, плотию  
повешен, / Жизни Подателю?

**Тропарь, глас 7-й**

Яко светозарное светило, / лучами  
Божественных дарований сияющее, / яви тя  
Солнце Правды Христос Бог наш, / тьму  
безбожия и злонравия далече отгоняющая, / и  
зарями богопознания осияющая вопиющих  
верно: / Радуйся, святе Николае, / Христов  
исповедниче и Казахстанский чудотворче.

**На Бог Господь, тропарь глас – 7-й:**

**По 1-м стихословии, седален глас 1:**

Адаманта веры благоразумного, страдальца  
Христова и исповедника доблественного, днесь  
вернии благоговейно любовь почтим, великаго  
во смирении иерарха, кроткаго во архиереях  
святителя, неумолкаемаго Евангельския

благодати провозвестника, призывающа нас  
внити в радость Господа Своего и пети Тому  
научающа: прославляяй святых Своих, Господи,  
слава Тебе.

**Слава, и ныне, Богородичен, глас 1-й:**

Из Тебе, Пречистая Богородице, возсия нам  
Жизнодавец и Господь всех, не оставль  
Отеческих недр, сниде на землю и спасение роду  
человеческому дарова и от тли на нетление  
возведе зовущия: Радуйся, Всенепорочная Дево  
Богородице, Надеждо и Предстательство Тебе  
поющих.

**По 2-м стихословии седален, глас 5-й:**

Обновленческаго суесловия возгнушався,  
истинным последовал еси Евангельским  
заповедем, преблаженне святителю Николае,  
богомудре, и митрополю Казахстанскую во  
отеческом древнем благочестии утвердил еси, да  
христоименитых людей множество во  
единодушии православно славят Троицу  
Единосущную, Юже моли спастися душам  
нашим.

**Слава, и ныне, Богородичен:**

Имамы Тя к Богу истинную Предстательницу,  
раби твои, Всенепорочная, дерзновение бо к  
Нему, яко к Сыну Своему, имаши. Темже со

архангелом вопием Ти верно: Благословен,  
Пречистая , Плод чрева Твоего.

### Величание:

Величаем тя, Христов исповедниче, святителю  
Николае, и чтим болезни и труды твоя, имиже  
трудился еси во благовестии Христове.

### Псалом избранный:

#### По полиелее седален; глас 4-й:

Весь еси, блаженне отче, в вышних присно во  
обителях райских, в селениях праведников  
водворяешься, но и нас, паству твою, со  
страстьми и похотьми и духами злобы  
поднебесными непрестанно брань ведущую, не  
оставляеши, и, тебе тепле почитающия,  
наставляеши к разуму Божественному и  
деланию усердному заповедей Христовых, и  
всякая благополезная прошения наша  
исполняеши, подвизая пети тебе: Радуйся, святе  
Николае, Христов исповедниче и Казахстанский  
Чудотворче.

#### Слава, и ныне, Богородичен:

Едина верным заступление явилася еси,  
Всенепорочная, от Твоих бо Приснодевственных  
кровей воплотися Слово Божие, советом Отчим  
и, земная с небесными совокупив, в древнее  
отечество земнородным вход устрои. Сего ради  
молим Тя, Всеблагая, не лишены нас сотвори

Сына Твоего и Бога нашего царствия, яко да поем Твое величие.

**По 50-м псалме стихира глас 6-й.**

Веселися и красуйся град Алма-Ата / торжествуй и радуйся Казахстанская митрополия / светло совершая благолепную память архипастыря своего, / Христова исповедника блаженного Николая, / скорбящим сострадательного утешителя, / обидимых теплаго заступника, / болящих безмездна врача, веры и благочестия образа чиста, / молящегося о спасении душ наших.

**К А Н О Н**

**Припев: Святителю и исповедниче Христов Николае, моли Бога о нас.**

**П е с н ь 1-я**

**Ирмос:** Поим Господеви, / проведшему люди Своя сквозе Чермное море, / яко Един славно прославися.

Песньми прехвальными восхвалим, вернии, всеславную память исповедника Христова и архипастыря нашего Богоноснаго святителя Николая, Подвигоположника Сладчайшаго Господа Иисуса, величающе.

Любовию христоподражательною во изгнании, правды ради, победил еси беззаконнующих

неистовство и напасть, и явился еси  
добропобедный исповедниче Христов,  
приснопамятне Николае, отче наш блаженне.

Великая сила благодати Божия в великих  
лишениях, прещениях же и глумлениях от  
безбожных тобою, страдальче, наследована  
бысть, ею же в земном служении твоём и по  
отшествии в небесные кровы верным токи  
целебныя источаеши, святе Николае,  
Казахстанския митрополии Похвало и  
Украшение.

**Богородичен:** Милостива мне, Всемиловитая  
Мати, Сына Твоего и Бога нашего сотвори,  
Пренепорочная, в судный день страшнаго мя  
осуждения избавляющи.

### П е с н ь 3-я

**Ирмос:** Ты еси утверждение / притекающих к  
Тебе, Господи, / Ты еси Свет омраченных, / и  
поет Тя дух мой.

Вседержителя силою духовною укрепляемь,  
мудре, в кротости и смирении вся злоключения  
терпя, крепость злобы древняго злоначальника  
низложил еси, Христа поя во веки.

Исповедничества чистаго и доблестнаго венцем  
преукрашенный во страданиях твоих,  
апостольских учений и отечественных догмат  
хранитель верный в Церкви явился еси,

рассеянные чада церковные во едино стадо собирая, да в скорбех и радостех Христа поют во веки.

Яко же солнце незаходимое, лучами любви Божия сияющее, явился еси страждущим чадам церковным, яростию бури безбожного злочестия по обширным просторам Казахстанским рассеянным. Их же сердца и души духовно возгревая подвизал еси, хвалебно пети Христа во веки.

**Богородичен:** Изми мя, Всенепорочная, грехов лютых бури и вихря помыслов нещадно уму моему находящих избави мя, Пречистая.

**Седален, глас 8-й.**

Чистотою душевною и телесною сияя, терпением в гонениях и лишениях мужествовав, прегордаго Велиара главу сокрушил еси, ни ласками, ни ложными прещении, ни благовидными предложениями богоборцев ни себе, ни паству твою обманути не попустил еси, Богомудре, святую веру непорочно храня, и Богу до конца угодил еси. Сего ради от Него чудесы при жизни и нетлением по смерти почтен еси, яко причастник Божия Благодати.

**Слава, глас той же:**

Во святительстве исповеднически благочестно пожил еси, словесныя Христова стада овцы

словом увещавая и делом назидая, и во изгнании неправедном, благодаряще Бога и огнем любви неугасимья к Нему пламенея победоносным венцем от Христа Подвигоположника достойне увенчан, молися паствы твояе спасти люди, любовьию память твою почитающия.

**И ныне, Богородичен:**

Человек враждующих озлобления и демонская злоухищренная стрельня угосила еси, Всенепорочная, ходатайством твоим благомощным к Сыну Твоему и Богу нашему, тако и нам, во обстояниях невидимья брани сущим, душам спасение и телесное здравие подаждь, присно блажащим Тя и добротолубием воинствующим во славу Рождшагося от Тебе.

**П е с н ь 4-я**

**Ирмос:** Услышах, Господи, / смотрения Твоего таинство, / разумех дела Твоя, и прославих Твое Божество.

Жизнь твоя, вся духу Божию всецело открытая, разруши лукавых духов и безбожных хулителей хитросплетения тщетныя и путь прав многим, ищущим спасения яви.

Благаго Бога во всем житии твоём подражатель явился еси, священноначальниче и исповедниче Христов Николае, милость и любовь

нелицемерныя и ко всем равныя Духом Святым стяжал еси, поминая и творя реченное: возлюбиши искренняго своего, яко сам себе.

Изволением Божиим и избранием святейшего Патриарха Алексия архипастырем Казахстанския митрополии, поставляешися досточудне и наставник, иже ко спасению, пастве твоей многострадальной во утешение даруешися, непрелестным путем верности Святей Невесте Божией церкви Христовой, вводя стадо твое во ограду Небесную.

**Богородичен:** Яко же престол огнезрачен, носиши Солнце Правды, Богоблагодатная Владычице, Его же моли спасти мя, греховною тьмою о блаженнаго.

### П е с н ь 5-я

**Ирмос:** От нощи неведения / Боговедением просветивый концы, / просвети мя утром человеколюбия Твоего, Господи.

Обновленцев, одержимых лестию всеведения и гордынею усовершенствования церкви, яко волки, во облике овец пришедшия, прозрел еси, к свету отцепреданныя православныя веры паству твою наставляя еси Богомудре, за еже и страдания претерпел еси, и от Бога, яко исповедник истинен, прославлен еси, святе Николае.

Благочестия рвением распалаемь, поругания и досады, заточения и изгнания претерпел еси, поминая Господа и Спаса неповинныя страсти, нашего ради спасения претерпевшаго. Сего ради того помощию победил еси враги видимыя и невидимыя на тя вооружившиися, ухищрения тех сокрушил еси и паству твою во правоверии утвердил еси, собою образ показуя, и путь ко спасению возвещая и от злых пременение подавая.

Непрестанно врученное ти наследие церковное в Духе Святом о Христе поучая, на живоносных закона Божия и любви пажитях словесное стадо твое упасл еси и богоприятным молитв твоих кадилком вся пределы Казахстанския облагоухал еси, да явится во стране сей богоприятен плод спасительнаго сеяния Христова и пшеница добрая усокровиществуется во хранилища Небеснаго Домовладыки.

**Богородичен:** Предстательницу непостыдну и Заступницу тверду имуще Тя, Пречистая, неудобства всякого избавляемся и печали, и огорчения.

**П е с н ь 6-я**

**Ирмос:** Молитву пролию ко Господу / и тому  
возвещу печали моя, / яко зол душа моя

исполнися / и живот мой аду приближися, / и молюся, яко Иона: / от тли, Боже, возведи мя.

Кротких глагол твоих вещании и образом добродетельнаго жития твоего, святе, обширная паства твоя поучашася в Духе Божественном тобою мертвой убо быти греху, живой же Господеви, да и на небеси в блаженной вечности с тобою в радости Божественной водворится, священнотаинниче.

По стопам апостолов Христовых непорочно ходяща, зряху тя духовныя чада твоя, священноначальниче Николае, отче наш, и пророчества дар в тебе видяще и сокровище исцелений недугов душевных и телесных, ты знающе с верою и любовью притекаху к тебе, яко врачу скоромилостиву.

В преддверии испытания Церкви своя устроет тя Господь архиереем быти, святителям древним земли русския добрыми и благими нравы подобна, да, егда буря безбожия, попущением Его, сокрушати будет видимые и незримые храмы, на песце самомнения и превозношения сооруженныя, утвердиши в терпении иже на недвижемем камени веры тверды и смирения духовное свое строение возвигоша.

**Богородичен:** Буря безмерных согрешений смущает помраченный ум мой, Богоневестная

Дево, и во глубину отчаяния погрузити тщится. Но ты, Всеблагая и Многомилостивая яко благих виновная, даждь ми тихия покаяния пристани благоуспешно достигнути.

**Кондак, глас 8-й.**

Избранный от Предвечнаго Архиерея и Церкви Зиждителя, данный Казахстану ходатаю изрядный и заступниче пречудный, святителю Николае, ублажая подвиги и труды твоя, любве ради Господа тобою подъятыя, восхваляем дивнаго во святых Своих Бога нашего, давшаго тебе благодать величия Своего и научившаго нас любовью пети тебе: Радуйся, святе Николае, Христов исповедниче и Казахстанский чудотворче.

**И к о с :**

Пение благодарственное Пресвятей Троице вси православные, на обширных Казахстанских просторах живущия, взывают, яко благоволи даровати нам тебе, святе, пастыря добра и молитвенника благомоцна, и притекающе к раце святей твоей, усердно просят: моли о нас Всеблагаго Бога, да, яко Судия и Мздовоздаятель праведнейший, не отвратит лица Своего от нас недостойных, присно согрешающих и преогорчевающих благоуторбие Его, но, яко Отец чадолюбивый

накажет ны зде, во временнем житии нашем, да, отвергше тленная и временная, обрящем нетленная и вечная, благодарне вопиюще тебе таковая:

Радуйся, яко адамант точилом язв и болезней испытанный.

Радуйся, яко злато в горниле огненных искушений очищенный.

Радуйся, прещений лютых не убоявыйся.

Радуйся, и самыя смерти не устрашивыйся.

Радуйся, странствия Владычня и безсмертныя трапезы Его приобщивыйся.

Радуйся, яко звездо лучезарная, над Казахстанскою странною возсиявый.

Радуйся, во вся концы ея свет благодати Божия пролиывый.

Радуйся, благий вертоградарю, сад веры благочестивыя во стране сей насадивый.

Радуйся, поточе сладости, водою благочестия паству твою напоивый.

Радуйся, миром Христовым и богоприятных молитв твоих кадилом просторы Казахстанския облагоухавый.

Радуйся, яко Божию изволению последуя, инославныя мусульмане тебе со усердием служаху.

Радуйся, яко и ты онем любовию теплою всегда благодеял еси.

Радуйся, святе Николае, Христов исповедниче и  
Казахстанский чудотворче

### П е с н ь 7-я

**Ирмос:** От Иудеи дошедше, отроцы / в Вавилоне  
иногда / верою Троическою в пламень пещный  
попраша, поюще: / отец Боже, благословен еси.  
В гонениях лютых искушен быв, по слову  
апостольскому, искушаемым Богодарованный  
помощник явился еси, многострадальне. Иереям,  
в темнице смертною мукою томящимся, в  
сонном видении представ, утешение и  
ободрение духовное и телесное подал еси,  
наставляя их со упованием пети: отец наших  
Боже, благословен еси.

Фарисейскаго обновленческаго нечестия  
отвергшись, Христово смирение всегда во уме и  
сердце твоём имел еси и единство церковное  
нерушимо хранил еси, священноначалию  
истинному всегда сыновнее послушание  
воздавая, тем же и нас в кротости и смирении  
утверди, да до скончания жития своего сынами  
и дщерьми Единья, Святыя, Соборныя,  
Апостольския Церкви Христовы будем и  
блажества вечнаго с тобою, пастырю наш,  
наследницы явимся, поюще: отец наших Боже,  
благословен еси.

Человеколюбцу Богу прилежно молитвы вознося  
Заступницу Усердную рода христианского  
Мать Божию всегда помощницей имея,  
ищущим избавления от телесных недугов  
прежде духовную пищу предлагал еси,  
наставляя из глубины души радостно пети: отец  
наших Боже, благословен еси.

**Богородичен:** Пресвятая Дево и Пренепорочная  
Мати, Бога плотоносна на спасение мира  
рождшая, от грехов всяческих и скорбных  
обстояний, яко Скоропослушница чтущия Тя  
спасая, о Тебе вопиющия: отец наших Боже,  
благословен еси.

### П е с н ь 8-я

**Ирмос:** Седмерицею пещь / халдейский  
мучитель / Богочестивым неистовно разжже, /  
силою же лучшею спасены, сия виде, / Творцу и  
Избавителю вопияше: / отроцы благословите, /  
священницы, воспойте, / людие, превозносите во  
вся веки.

С ревностью равноапостольною разсеянную по  
казахстанским просторам боголюбивую паству  
твою посещая, непрестанно во благочестии сию  
наставлял еси и в терпении утверждая, научал  
едиными усты и единым сердцем воспевати:  
отроцы благословите, священницы воспойте,  
людие, превозносите Христа во веки.

Щедраго и всемилостиваго Господа рабе благий и верный и служителю благоприятный был еси, присноблаженне святителю и исповедниче Христов Николае.

Научи и нас, в добродетели убогих, течение жития своего в трезвении, послушании и благочестии проходить, в чистоте сердца принося хвалебную песнь: отроцы благословите, священницы воспойте, людие, превозносите Христа во веки.

**Богородичен:** Тя, красную Палату и всечестный Сосуд всех Царя, Пресвятая Владычице, воспеваем, спасеннии Тобою, Дева Чистая, да и нас храмы быти нерукотворенны и с Тебе Рождшемуся и очистившему всякую скверну и злобу сопротивную явиши поюция: отроцы благословите, священницы воспойте, людие, превозносите Христа во веки.

### П е с н ь 9-я

**Ирмос:** Устрашися всяк слух/ неизреченна Божия снизхождение,/ яко Вышний волею сниди даже и до плоти,/ от девического чрева быв Человек,/ Темже Пречистую Богородицу, вернии, величаем.

Постничества и воздержания правило нерушимо храня, непрестанно молитвою и чистотою сердца Христа Распята и Воскресша в себе

живуща со Отцем и Духом Святым имел еси и во ограду избранников Пречистыя Матери Его себе вчинил еси, блаженне Николае. Темже по отшествии твоём Всеблагая Вратарница, двери райския верным отверзающая, во Иерусалим новый и вечный вход отверзла ти, да со всеми святыми Единосущныя Троицы державу поеши радостно во веки.

Легко, яко орел, крылома веры чистыя и благочестия непорочнаго небесную высоту достигл еси, Богоносе отче Николае, почеть горния славы прияв от Судии Праведнейшаго и Мздовоздаятеля. Но, любви ради несокрушимыя к пастве твоея, показа нам Господь цельбоносныя мощи твоя, источающия исцеления с верою к ним приходящим. Тем же молим, помяни нас, верою и любовью чтущих тя, да выну всесветлую и всечестную память твою достойно ублажаем.

Аще и малое от убогаго усердия приносимое тебе ныне, святе, благохваление приими, яко же две лепты оныя вдовицы прият Христос Господь, и нелишенны нас сотвори твоих благодеяний и даров и прегрешениям нашим прощение у Господа испроси, да тя прославим, милостиве, во веки.

**Богородичен:** Пощади и помилуй падшее создание Твое, Спасе, Рождшую Тя Матерь

сохранив неврежденну, и благомошными ея молитвами, егда сядиши судити всяческим, вечнаго осуждения избави мя, яко Безгрешен и яко Милостивый Бог и Человеколюбец.

**Светилен, глас 7-й :**

Боготочною кровию, на Кресте излианною, и тою искупившаго падшее создание Свое от греха, проклятия и вечныя смерти, верою зря волею распеншагося за ны Владыку и Подвигоположника нашего и усердне к Нему любовью горя, всем житием твоим провещал еси: мне, еже жити – Христос, а смерть - приобретение Христа, Ему же на небесех во славе вечней предстоя, моли спастися благочестно ти воспевающим: Радуйся, святе Николае, Христов исповедниче и Казахстанский чудотворче.

**Слава, и ныне, Богородичен.**

По Бозе упование имуще на Тя, Пречистая Богородице, молимся Ти прилежно, ко иже из Тебе Рождшемуся мольбами, невредимы сохрани нас и спаси души наша.

**На хвалитех стихиры, глас 2-й**

Киими похвалами / воспоем в добродетелях преславна иерарха, / венцем чистаго исповедничества украшеннаго, / болезнующих телом и душею покаянием врачующа, /

милостями и человеколюбием дарованными от Бога, / Его же непрестанно подражая, / молит подати нам велию милость.

Киими песненными добротами / восхвалим архипастырских исправлений красоту. / Столпа Церкви непоколебима, / Православия исповедника истинного, / богоподражательным своим житием Казахстанския митрополии просветившаго концы, / его же, яко вернаго служителя прослави Христос Бог, / подающий нам велию милость.

Киими благогласными словесы / ублажим богоноснаго святителя и отца нашего Николая, / за Христа мужественна страдальца, / за паству свою дерзновенна ходатая, / безбожия и злонравия обличителя, / чудеса преславна силою Божию совершающа / и подающа от Христа Бога велию милость

**Слава, глас 4-й:**

Евангельских учений рачителя / и страстем невинным Христа, Агнца Божия, подражателя, / днесь обстояще священную раку, / токи благодати приемлем независтно / и, верою торжествующе, благодарне к нему взываем, глаголюще: / Радуйся, Христов исповедниче, святе Николае, / яко во тленнем сем житии / нетленная благодати Божия / в делании

заповедей Христовых приобщивыйся / и со апостолы, пророки, мученики и иерархи / в Небеснем Царстве сликовствующим явивыйся, / молися Господеви непрестанно / благословение и мир Отечеству нашему даровати / и душам нашим велию милость.

**И ныне, Богородичен, глас тойже :**

Богородице, всех Царице, / православных христиан Похвало и непостыдное Упование еретичествующих раскольническая шатания разори, / и благодатию Сына Твоего озари сердца, / под вседержавный покров Твой притекающих.

**Славословие великое. Тропарь.**

**Слава и ныне, Богородичен , глас 7:**

Яко нашего воскресения сокровище, / на Тя надеющиеся, Всепетая, / от рова и глубины прегрешений возведи, / Ты бо повинныя греху спасла еси, / рождшая Спасение наше, / Яже прежде рождества Дева, и в рождестве Дева, / и по рождестве паки пребываеши Дева.

